

附錄詩詞卷之三十一 山東

詩贈行

七言律詩

都下文章舊有名東邦出守是榮行地無山水難乘興
人在平原好勸耕儉歲家家愁賦役窮閭日日望仁明
盡登赤子春臺上化雨無聞育俊英

堂邑穆孔暉 翰林學士

吾鄉咫尺大河濱流徙從來苦要津四野桑麻今寂寞
高城樓閣但嶙峋卽煩

聖主分僊吏况有

龍章出

禁宸

時有申重守令之詔

海內蒼生惟重守知君籌策更無倫

東郡坐瀕河後煩賦重邇兼罹荒歉民不堪命所賴
惟守之良當路乃擇吾

芹山陳公以公博學宏才實大受之器守固不足以
盡其蘊姑小試焉以起民于溝中則大受實基之予
郡人公郡守也生其地惓惓其鄉與守其土惓惓其
民情一而已予見公愛民獨切虛已能受故於公之
行不能無言及不能盡言也

東昌許成名翰林學士

詞

題卷

七言律詩

汝南佳士久知名粉署新乘皂蓋行兩序書聲催夜讀
四郊農業省春耕郡東簪盞秋初半河下船開月正明
珍重良哉二千石龍黃無忝漢時英

予有事于京口道經東昌陳太守芹山乃出穆太史
玄菴所贈詩卷索予和之率爾賦此情見乎辭

太原喬宇

太子太保吏部尚書

口碑隨處說賢名忽見春郊五馬行絃誦萬家塵外沸
桑麻千里雨中耕路當津要延耆俊天與丹衷荅

聖明莫恠老夫懼更極向來民部識才英

舟過東昌飽聞故人芹山太守頌聲次韻奉贈一首

情寓乎辭

鳳山秦金

南京兵部尚書秦贊機務前戶部尚書

潯陽江上蚤知名五馬清風羨此行綠野桑麻開夜戶
黃堂膏澤慰春耕東方飽挹旬宣化南省爭傳藻鑑明
莫負雲龍千載會治平端望濟時英

芹山曩以地官奉使西江丁自湖藩入

觀往返道經深荷斯文之愛士辰夏再過東昌和韻一

章以叙今昔風帆匆匆不工殊可愧也君嘗校文南

省以得士稱故鄙句云然

三山林庭擢

太子太保工部尚書

黌校當年識姓名專城千里望君行潁川治已徵鳳集

渤海民皆買犢耕自是北方多感慨極知東郡有神明

芹山山畔精靈氣產取朱轡濟世英

右次玄菴翰長韻呈芹山郡守覽笑且用紀郡人喜

幸之私云爾

濮陽李廷相

戶部尚書燕翰林院學士

傳經不羨漢儒名出牧今勞河郡行日擁帆檣千鷁集
歲調風雨萬家耕揮毫更擬春雲爛敷政仍懸海月明

屈指治平誰第一匡時勲業有豪英

東郡濱河而煩劇過他邦遠甚芹山能不勞而興治
功且蔚然文藻為政有章今之循吏也偶於卷中得
玄菴相贈而白巖蒲汀皆大書和之乃躍然從諸未
而忘其陋云

龍石許成名 翰林學士

金聲玉屑舊知名書戰朱轡乍此行幾處沸風歌夜作
一天膏雨喚春耕誰無父母懷官府郡有循良佐

聖明忙局要途兼拱極安危須仗萬人英

深徃歲校藝禮闈時則知芹山識芹山乃自今日道

東昌始將所謂傾蓋如故者非耶聊次諸作以抒夙欽

儼山陸深 國子祭酒

李海務前楊柳花春風三月我還家莫言春色花無賴
喜有主人情更嘉青蒲娟娟刺淺水白鷺點點團晴沙
清尊瑤瑟有高調與爾酣醉歌日斜

芹山予相聞舊矣一見聊攝接數語歡甚已而追送
李海務觴予諮之邦政兼示予以舊所為文文模左
氏而政則循良之遺意也恨相見之晚於是賦李海
務以言別焉

四明王應鵬 都察院左副
御史

古風

憶昔潯陽隈翠嶽廬山曲偶接陳民曹超脫話無俗一
別甫十年細論未緣續虛懷文學奇不見紙筆辱今來
崇武道沙立挺如鵠招邀上我舫恍若夢中矚說舊不
欲辭廿里送不足迺出名公卷留題向予囑因之叙睽
違非曰步芳躅行當復此來無妨共燈燭

芹山陳戶曹昔有事江州會予別去者幾十年今日
守東昌予適過而見之真若夢寐也芹山出卷索題
書以歸之

崑山周倫 刑部尚書

東藩形勝控

神京古博南來第一城萬里漕舟秋後集兩崖燈市夜深
明嶺岷岱岳晴霞起寂寞巢陵宿草生此日正迎新刺
史驪駒何事獨關情

明山姚涑 翰林修撰

五馬春風白玉珂赤城車從候傳呵飛騰牧伯恩非淺
點檢郎曹績最多民瘼

朝廷資撫字賢聲道路是謳歌

循良久屬巖廊望况有高名在甲科

華亭徐階 翰林編修

都亭曉發春開雪細柳雙旌紫陌長五馬雲邊新剖竹
九霄僊省昨含香嶙峋看望東山秀絃誦風聯闕里芳
名世早聞經濟業君才何謝漢循良

任丘鄜汭吏部郎中

古風

觀東篇

青陽轉東陸朱輪辭朔臺雪華山際曉江色煙中開彼
美高世士夙抱離群才英名流四國文彩輝三台牧守
赴齊魯經綸象雲雷泰山萬峯宗滄瀛百川迴陰陰鄒
嶧桐鬱鬱闕里槐先哲有遺軌佇望傷孤懷欲往從之

遊玉檢封徂徠君侯樹芳烈翔翔遍九垓

蒲圻廖道南右春坊太子中允

博平郡守太丘孫郎署清名何藹藹公餘閉戶祇誦讀
門外有草生帶簪如冬雪挺孤松清比秋蟬印寒瀨
昨者藝苑共掄材濟濟英豪歸矚睽望重清朝久見推
恩深大郡俄超拜共言才可濟時艱却喜身逢隨道泰南
浦離筵草色青蕭蕭班馬夕陽外杯傾春釀休辭鱖魚
出寒水燕可膾昇平海內官府樂澶漫山東壘域大南
通舟楫控江淮東望山川連海岱赴官誰不羨朱輪行
縣人爭瞻皂蓋閭閻憔悴今應甦使君豈第民所賴淮

陽卧治還有成穎川壯課常居最君才何祇二千石廊
廟他年應可待

莆田林文俊 國子祭酒

博平郡枕漕河側地屬喉襟跨南北送迎來往度年年
誰把疲瘡抱深側邇來歲歉民存饑况復刀斗驚潢池
漢庭良吏不可作幾時空谷回春熙

聖主憂勤切寰宇惓惓欲拯閭閻苦一時妙簡得循良行
聽齊東歌召杜

桂林張星 翰林編脩

詞有引

述職贈言

賜進士 材院侍讀學士 奉直 國史 經筵講官 誦勅 前在 春坊 太子諭德 龍石許 慶 誤

伏以

車書一統海隅仰日月之華玉帛多方

天朝嚴會同之典儀式罔愆于周制幽明莫爽于虞廷顧
東土之據通津儼名邦而雄諸路九區星拱萬國雲
來恭惟

芹山邦伯先生 執事 宏詞高第北海鷗鵬光價無倫
南交珠貝首揚休乎粉署早振翮于雲達經筵淵源

文衡藻鑑金魚賜佩秩登二千石之尊銅虎分符綱
總十入牧之要幸斯民之逢杜召父母閭閻進多士
而講唐虞師生黌序當簿書之隙手不停披際舟楫
之衝席無暇煖持體務從寬重推心痛斥煩苛時雨
時暘四野釀成和氣不知不識群黎茂被仁風臺臣
有卓異之章

天子聞治平之政茲者群侯述職上國觀光乃修戒乎晨
裝遂有嚴於星駕某等恒叨倚玉暫惜分岐攀行轡
以飛觴聽鳴珂而入

觀苑雲宮柳憶春遊處處鶯聲桂棹蘭舟看榮歸飄飄

鳳翥情深樽俎詞媿瓊琚

詞曰

流颿飛雪河橋滿五馬行嘶臨上苑

鳳城杳靄書中遙紫雲佳氣參差轉揚策奮高衢聲華

應占

清朝選敞彤墀玉樓銀闕正啓昇平宴

九重日月雙龍輦僊曹爭奏群獻頌宣化御醴醉瑤階

袞衣歡動春風暖英俊看延攬河山寧謐休光闡諒賢

侯

天子知名待遷倚非晚

右調歸朝歡

又

賜進士第中憲大夫奉勅巡撫甘肅等處地方都察院左僉都御史東郡牛天麟撰
伏以

銅虎分符千里重專城之寄介珪合瑞三年適歲事
之期正帛攸同風雲齊慶恭惟

太府大人先生台座扶輿鍾秀

王國克生德鍊金精姿凝玉潔學紹聖賢之緒名先科
第之英粉署初銜而勳名並懋黃堂繼擢而德澤尤
深治化之隆允愜時望水蘂之節無媿古人為國薦

賢起鷗鵬於溟渤擁比講道列桃李於門牆抑兼併
以均田紓困窮而節用流移復業野無鴻鴈之歌奸
宄潛形庭息鼠雀之訟循良誠古三千石豈第宜今
十八城茲者入

覲惟期膏車載道其等叨居教下無任激衷顧鴻漸之
方亨嘉鶯遷之有兆僭陳蕪語用布芹忱

詞曰

雪消梅蕊含清漱萬里江山紅日透祖筵別去上長
安携得龍光輝宇宙

九重入覲歸來後御苑鶯聲弄春晝玉鉉金鼎待調和

嗟我東人思借寇

右調玉樓春

東昌府儒學生員牛賢等

聊城縣儒學生員索禮等贈

又

門生郭鉉 辛卯解元

伏以

聖主御乾萬國仰垂衣之治輿情顯比三年適輯瑞之期
自古帝王用秩典而行黜陟凡今臣庶因厥時以奏

忠勤

朝廷所以達四聰天下歸於大一統恭惟

芹山太府先生台座斯文雅望一時山斗攸歸閭世

雄才千載風雲邁會夙參列宿光凝尺五之天出牧

大方澤被十八之屬節堅冰陸闢風而吏胥服心誠動

鬼神隨傳而雨澤應候身每以乎教誨士樂得師政

惟在於循良民稱不擾實封八奏一方之困遂蘇八

事條陳百姓之情俱悉蓋有陰蒙其惠孰不深感於

秉監司課最之文如將弗及空臣薦賢之疏未之或

先忽

大觀之臨臨幸忠懷之有待聞聞民隱將敷奏于

形庭牧守官箴已分明於成牘印蒙

清問自可對揚

帝德罔愆方離明之麗正

天顏有喜膺晉接於康侯其等久矣
休庇之中堂從賓客
之後設河陽之幔用餞長途歌下里之詞多慚大雅
共陪祖道望行色之漸遠行候
佳音幸春風之尚早

詞曰

杏杏長陌霜晨映行色千里

柳城三載朝宗今當親覩一朵紅雲
紫彩綉雲望燕山

直北憶茲時玉漏初沉金門但照
錦行集迷常職

龍顏懌下殊錫恰暖日朝升麗晴空都薰透群臣袍烏五

鳳樓中春更好君若歸來定携得便散與蒼生作萬

年命脉

右調帝臺春

平山衛指揮蔣奇等

東昌衛指揮時正等贈

復邵贈言

賜進士出身朝列大夫南京國子監祭酒武城王道撰

伏以

寶殿山呼二千石之故事瑤京歲覲十三省之恒規禮成

陋秦漢之儀職迷邁殷周之典大明黜陟有道唐虞
恭惟

芹山邦伯先生臺下京闈碩彥海宇鴻儒器本珪璋
詞流江漢彤墀大對蔚然有補皇猷粉署恢施卓爾
能超地部盤錯總難于劇郡治平懋著乎東藩披豈
弟之仁風旃幪四野樹端嚴之道範陶鑄斯文卹患
拯裁權堪盡變祈暘禱雨誠足通幽去聰察而洞覈
諸司省科式而務持大體履官清慎實度越乎尋常
見道分明非剽竊乎章句集宣公之八計振伏伽之
六條苙凝敦浮競之風寬裕戒深苛之政天曹書最

京邑蜚聲稱循擬兩漢之前揚芬自

九天而下燕臺珂里多簪開北海之尊魏闕

龍章岐路佩南金之錫助吟囊之逸興兩岸青山泛彩
鷁以飛來長津碧樹某等馳情山斗願坐春風屈指
歲時有違三月望歸旌乎北渚瞻飛憶于東臯載綴
短章聊申下悃

詞曰

帝闕仙見人傳清望

聖朝循吏真誰讓龔黃政儘教海內知名治功赫聲與風
雷激盪歸帆春正好滿路鶯花河山過眼吟懷壯

試問古東邦川原膏好成新漲
叟童懽暢看城闈冠蓋
迓車塵報賢侯來自

九重天上

右調洞仙歌

得士贈言

嘉靖辛卯得解元郭鉉賦此

翰林學士許龍石氏撰

伏以

儒者之功莫榮於造士循良之政匪專于庇民顧博
郡挹鄒魯之流風肆多賢毓海山之間氣梁棟每頌
於大臣甄陶克鑄乎英髦稽曲昌之映璧奎知鴻鷲
之凌霄漢蔚乎作人之効備哉成物之能恭惟

芹山先生

北海英流南宮峻選理錢穀於地部精

藻鑑於春闈能文出秦漢之間爲政自龔黃而上飛
蝗不入窮簷被君子之休零雨如期廣野錫農天之
慶澹素堪爲世範冰霜靡浣秋毫四民之安堵無虞
六事之課功惟最茲從較藝獨幸掄材見利穎之脫
自囊中望青雲而附諸驥尾由夫春風侍教多術多
方乃爾秋榜爭雄如携如取光騰草木慶溢冠紳其
等濫厠邦僚諺沾德潤迓幃帷之載至倍仰聲華識
麟鳳之爲祥曷勝懽艷擬揄揚而作頌媿淺陋以難

言持螯微醉幸回巨矚

詞曰

鎖院風清連城價重旌麾遙自東來正霜高鴈滿黃
菊初開遴選更多門下士震河山萬里秋雷文星光
射今番東郡煞占倫魁 只應全仗雄才羨名如山
斗動望齊恢肆錦堂華宴人在蓬萊况喜豐年無菜
色閭闔荷雨露栽培民安物阜鹿鳴歌裏好醉金罍

右詞金菊對芙蓉

旌異贈言

嘉靖庚寅揀荒臺省交薦賦此

賜進士

第翰林院學士承直大夫同修

國史

經筵講官堂邑穆孔輝撰

竊聞

堯咨岳牧漢詔循良寄守宰以宣風撫蒸黎而贊治
顧恢施每成于激勸式勲庸倍見于褒揚卓越惟艱
欣逢是快恭惟

芹山邦伯先生派發天南河精岳秀聲流闕下鳳彩
星華質有類于璵璠力已窺乎堂奧文模秦漢其誰
障彼狂瀾詞邁齊梁乃爾鳴吾大雅素懷悠爽洪蘊
淵淪暫出牧于河邦早蜚聲乎地部清望屹諸曹之
上英猷折群議之衷器屬端貞才膺弘濟解焚糾惟
消鎮靜事揭網維理繁浩罔屑科條政從簡重民罹

饑饉必惻然起之溝中士賴甄陶每舉而進諸門下
保奠居而歌鴻鴈萬姓嬉嬉時按部而褰帷裳四方
凜凜苗則稿矣格天成禱旱之功民其魚乎發帑濟
襄陵之變肆官箴之日懋臺省交馳警聲聞之旁流
雷風丕動允矣匡時之略蔚然振古之英某等忝竊
賓僚幸依山斗蕪段碧玉心恒懸戀德之私川海明
珠口不啻懷珍之懔遙瞻皎月僭吐秋螢太古黃鐘
竊鳴春蚓

詞曰

玉露生涼正星流大火律轉清商膏雨新霑蒸民安

堵閭閻百穀盈倉聽村夫無吠警見原隰遍耕桑都
道是重來杜召再起龔黃勲業非常看匡扶景運
有華國文章瑩若冰壺皎若玉樹翩然彩鳳高翔魏
闕馳聲燕臺增價齊魯流芳待風雲鵬搏虎躍作棟
明堂

右調喜遷鶯

奏疏

南京前軍都督府經歷司都事臣陳一龍謹

奏爲陳情比例懇乞

天恩俯賜贈謚祭葬以光泉壤事臣父陳儒係錦衣衛人
近附直隸常州府宜興縣民籍由嘉靖二年進士初
授戶部主事監督居庸昌平等關倉悉心經理錢糧
疏陳時弊五事歷員外郎郎中出納惟允竭力効勞
陞山東東昌府知府首以禁貪酷崇教化慎刑獄等
事下之諸屬圖惟化理嘉靖九年秋大水民苦昏墊
臣父疏乞盡蠲存留諸稅請以郡帑積羨用代運額

荷蒙

聖明俞允復極力拯濟民賴以甦立祠祀之陞浙江副使
巡視則浮海蒐兵而寇賊迭除督學則崇雅出浮而
人文丕變陞陝西右叅政按察使分守則經畧邊防
而強兵足食總憲則振揚風紀而除暴安民十九年
風霾之變應

詔陳安邊十策時北虜深入原州臣父統率延寧諸軍力
戰斬獲至五百餘級大致克捷荷蒙

欽賞銀幣陞山東左右布政使二十一年大旱亟將在公
積羨贖金糴穀數十萬石濟活齊魯又均平徭役參

酌戶口盡力調停撫綏六郡築臨清州城完蒙

欽賞銀幣嘉靖二十二年爲科舉事降授陝西宜君縣典
史陞直隸廬州府推官真定府同知湖廣僉事未任
丁憂復補山東青州兵備陞南京尚寶司卿改光祿
寺太僕寺少卿陞南京太僕寺太常寺卿署掌南京
國子監事或司符

留都或侍膳

內府成既厥心或典司馬政或秩掌禮樂罔敢怠事三
十年考察陳乞休致奉

聖旨陳儒不准辭着照舊供職陞南京戶部右侍郎總督

南京糧儲彼時倉廩空虛冗食太甚臣父切抱隱憂
具疏查催節年逋負清華跪名冒支籌度盈縮而
國賦用充三十三年改刑部右侍郎三年考滿進階通
議大夫是秋北虜犯宣大且邊儲告匱該兵部題奉
聖旨該鎮錢糧缺乏人馬饑疲已甚先任總督巡撫官坐
視不言好生欺國誤事蘇祐侯鉞都着錦衣衛差官校
去拿來問巡撫員缺暫着許論兼理吏部便推舉實心
幹事侍郎一員作速前去該鎮賑恤軍士區處錢糧隨
奉
聖旨陳儒着兼都察院右僉都御史寫勅與他上緊去該

臣父條陳兵馬錢糧屯田民運等事復奉

聖旨這所議事宜都着陳儒着實查處回奏臣父祇承
欽命馳赴邊關經理諸務賑恤過軍士二十餘萬查出官
民侵欠官銀米豆十數萬兩石清出屯田土地土四千
七百餘頃盡心幹理不備奸險事多就緒頗效微勞
回京復

命條陳十事該部復題看得侍郎陳儒奉

命籌邊未及半年而邊情利病考究詳明興革皆當俱荷
聖明採納施行改本部左侍郎復蒙

欽賞銀幣三十四年陞都察院右都御史奉

勅總督漕運兼巡撫鳳陽等處地方適值倭寇猖犯淮揚
一時擒斬共三百一十六名顆已經奏捷緣地方凋
敝運務廢弛臣父痛加釐正拯恤民艱自是諸務漸
舉地方頗安歲儲四百萬石盡運至京緣臣父當此
重任稟賦素弱積勞成疾三十五年具疏乞休未蒙
俞允時倭寇突犯瓜儀臣父方在告勉強扶病提兵趨赴
揚州調度兵馬錢糧極力戰守仰仗

天威官軍用命前後斬獲首級二百二十九顆生擒賊首
三大王并從賊二百二十四名已經陸續奏報訖倭
奴遠遁地方底寧復上疏乞休該吏部覆題為臣父
自受任以來夙夜奉公憂勞成疾以是節經懇疏求
退事非得已等因奉

聖旨陳儒着回京別用緣以戎馬馳驅鞠躬盡瘁復上疏
懇乞休致奉

聖旨陳儒照前旨留用該兵部題為倭寇再犯仰仗
天威驅逐退遁事荷蒙

欽賞銀幣三十六年奉

欽依致仕不幸于加嘉靖四十年二月二十日在家病故

臣伏覩

大明會典凡兩京二品以上文職并父母妻曾受本等封

者俱照例祭葬又文職一品至五品照依生前散官
果有功績合加封者例與加贈文武大臣有請謚者
本部照例上請欽此查得原任總督陝西延綏軍務
都察院右都御史張泰總督湖廣川貴軍務都察院
右都御史張岳病故俱蒙

聖恩賜以贈謚遣官祭葬實與臣父事體相同切思臣父
叨冒仕籍三十九年閱歷官階二十五任遭際
明時位躋二品清以持已公爾忘家竭力事

君夙夜匪懈每懷兢惕終始不渝且在邊方淮海屢獲軍
功藩臬府司多有遺愛其歷年章疏在部署歷任政
績在各省昭然可考不能備陳數歷中外雖少效犬
馬之勞而荷

國厚恩終莫罄消埃之報也又臣母封淑人楊氏亦先
於四十年正月十四日病故前母贈淑人侯氏俱受
封贈如蒙伏望

皇上擴天地之大德溥雨露之殊恩

勅下禮部照例一體給與臣父贈謚祭葬臣母亦得列名
並祭安葬則

聖德無涯澤及亡臣之骨而幽魂永慰感浹生臣之心是
豈惟臣父臣母感

恩于地下而臣等犬馬微喙一息尚存皆感恩圖報之日也臣不勝仰戴

天恩恐懼俟

命之至爲此具本親賫謹具

奏

聞

嘉靖四十五年正月二十一日

南京前軍都督府經歷司都事臣陳一龍

本月二十三日奉

聖旨禮部知道

禮部尚書兼翰林院學士臣高拱等謹

題爲比例陳情懇乞

天恩俯賜贈謚祭葬以光泉壤事祠祭清吏司案呈奉本部送禮科抄出南京前軍都督府經歷司都事陳一龍奏爲比例陳乞祭葬贈謚等因奉

聖旨禮部知道欽此欽遵抄出到部送司行准吏部文選清吏司手本回稱本官歷官陞任與奏相同及准考功清吏司手本回稱查得本官先任山東左布政使爲科舉事降陝西延安府宜君縣典史歷任漕運右都御史於嘉靖三十六年自陳屢乞休致奉

聖旨陳儒着致仕欽此又查本官二品未經考滿及准驗封清吏司手本回稱查得侯氏楊氏於嘉靖三十三年六月十一日該本部具題封贈淑人訖又奉本部送准兵部咨卷查嘉靖十九年八月內該總督陝西三邊都御史劉天和等題為捷音事內稱參政陳等功績陞賞等因該本部覆題節奉

聖旨陳儒等各賞銀十五兩紵絲一表裏欽此又查得嘉靖三十三年十二月內該刑部右侍郎陳題為聲息事內條陳十事該本部覆看得侍郎陳奉

旨遵未及半年而邊情利病考突詳明與革皆當復奉

欽依在卷又查得三十四年八月內該巡撫鳳陽右都御史陳

題為仰仗

天威勦獲江北倭寇事內稱通泰地方倭寇為患該臣督

兵前後生擒斬獲倭寇首級共三百一十六名顆開

載在卷又查得三十六年二月內該巡按直隸監察

御史吳伯朋題稱查覈過巡撫鳳陽右都御史陳

督率官兵陸續生擒小真倭一名從賊一名斬獲首

級一百四十四顆真倭二十八顆從賊一百一十六

顆倭器二百四十九件枝倭船四隻什物并銀二兩

奪回被虜男婦四十三名口及稱都御史陳與疾

討賊調度居多近蒙

明旨取回別用相應褒錄等因該本部覆奉

聖旨陳儒賞銀二十兩紵絲一表裏欽此等因各回報前來查得見行事例內開左右都御史病故與祭二壇工部造墳安葬又一欵二品官若有陞任加陞日淺政績未著及被劾致仕者臨時具由比例奏

請並擬又三品文官被劾致仕者聽本部通論其人平生功過酌量應否給與祭葬請自

或妻命被本等二品封者照例祭葬未封贈者無又查
查比例乞

贈諡事節奉

孝宗皇帝聖旨今後有乞恩贈諡的係部裏還要斟酌可否來說務合公論不許一槩徇情北例濫請該科記着欽此又查得原任總督湖廣川貴軍務兵部右侍郎張岳原任右都御史歿後兵部具題准復原職給與應得卹典備咨前來該本部覆題奉

聖旨張岳准照例與祭葬還與他諡欽此已經欽遵今該前因通查案呈到部看得原任總督漕運兼巡撫鳳陽等處地方都察院右都御史陳致仕在家病故係南京二品文職官員伊男陳一龍奏乞祭葬贈諡

順寧錄
仍要並祭伊母侯氏楊氏一節除贈官移咨吏部施行外為照本官發迹賢科致身顯秩歷敷中外積有年勞雖曾經言官論列而其勵精有為清慎自守之實終不可泯所據

卹典似當全給合無遵照見行事例與祭二壇造墳安葬
少妻淑人侯氏楊氏止授三品封贈於例原無祭典但伊男陳乞並祭不過附列空名揆之情理似無違碍合無止於本官祭文內並及氏位致祭一次不必別設壇品恭候

命下行翰林院撰祭文直隸常州府轉屬支給官錢買辦祭物香燭就遣本府堂上官致祭工部照例遣官送墳安葬其賜謚一節奉有

孝宗皇帝聖旨臣等不敢輕議伏乞

聖明裁奪原係比例陳情懇乞

天恩俯賜贈謚祭葬以光泉壤事及奉

欽依禮部知道事理謹題請

旨

嘉靖四十五年三月初七日

禮部尚書兼翰林院學士臣高拱

左侍 郎臣陳以勤

右侍郎臣潘晟

祠祭清吏司署郎中事主事臣常三省

本月初九日奉

聖旨是准照例與祭葬

太子太保吏部尚書兼翰林院學士臣郭朴等謹

題為比例陳情懇乞

天恩俯賜贈謚祭葬以光泉壤事驗封清吏司案呈奉本

部送准禮部咨該本部題祠祭清吏司案呈奉本部

送禮科抄出南京前經禮部司都事陳一龍

奏為比例陳乞祭葬事

禮部知道欽此欽遵該本部覆題奉

聖旨是准照例與祭葬欽此欽遵咨部送司行准考功清

吏司付稱本官歷任緣由與奏相同及稱二品未經

考滿備付前來查得弘治四年五月內為乞

恩比例贈謚事

孝宗皇帝聖旨今後有乞恩贈謚的恁部裏還要斟酌可

否來說務合公論不許一槩徇情比例濫請該科記着

欽此及檢照諸司職掌內開文職一品至五品照依

生前散官果有功績合加封者例與加贈又查得正

德九年五月內該已故原任總督陝西三邊軍務右

都御史張泰妻李氏奏夫歷官前職在任病故乞要
比例贈官等因該本部覆題奉

聖旨張泰准贈太子少保刑部尚書欽此又查得嘉靖三
十三年九月內准兵部咨稱已故原任總督湖廣川
貴軍務右都御史張岳在任病故所擬贈官咨部該
本部覆題奉

聖旨張岳准贈太子少保欽此欽遵通查案呈到部看得
原任總督漕運兼巡撫鳳陽等處地方都察院右都
御史陳致仕在家病故伊男陳一龍奏乞比例贈
官一節為照本官性行古介政履端嚴督學校而率

作有方總漕運而經畫底績勤勞久著于中外清節
無間于始終所擬贈官似應題

請但恩典出自

朝廷臣等未敢擅擬伏乞

聖裁緣係比例陳情懇乞

天恩俯賜贈謚祭葬以光泉壤事理謹題請

旨

嘉靖四十五年三月二十四日

太子太保吏部尚書兼翰林院學士

臣郭朴

左侍郎臣毛愷

右 侍 郎 臣 吳 嶽

驗封清吏司署郎中事 事 臣 武 金

本月二十六日奉

聖旨陳儒准贈戶部尚書

少保兼太子太傅工部尚書臣雷禮等謹

題爲比例陳情懇乞

天恩俯賜贈謚祭葬以光泉壤事屯田清吏司案呈奉本部送准禮部咨稱看得原任總督漕運兼巡撫鳳陽等處地方都察院右都御史陳 致仕在家病故伊男陳一龍奏乞祭葬贈謚一節合行工部照例造墳

安葬等因題奉

聖旨是准照例與祭葬欽此欽遵咨部送司查得先該本部爲審時省禮以寬民力事議得大臣照依今定後開價值轉行有司措辦給付喪家自行造葬等因題奉

武宗皇帝聖旨是造墳開壙工料價銀則例都准擬行欽此已經通行欽遵去後今該前因案呈到部臣等看得原任總督漕運巡撫鳳陽等處地方都察院右都御史陳 致仕在家病故係兩京二品文職官員造墳工料合給全價既該禮部題奉

欽依相應照行合候

命下行移直隸常州府將合用工料夫匠價銀照依後開數目行屬派辦該府仍委佐二官一員督理造墳畢日備將用過夫匠價銀數目類造黃冊奏繳清冊送部查考緣係比例陳情懇乞天恩俯賜贈謚祭葬以光泉壤事及奉

欽依是准照例與祭葬事理未敢擅便謹題請

旨

計開原任總督漕運巡撫鳳陽等處地方都察院右都御史陳致仕在家病故係兩京二品文

職官員造墳工料合給全價該銀二百五十兩夫匠一百五十名每名出銀一兩通共該銀四百兩

嘉靖四十五年三月二十七日

少保兼太子太傅工部尚書臣雷禮

左侍郎臣張守直

右侍郎臣徐綱

署屯田清吏司虞衡司郎中臣吳一介

本月二十九日奉

聖旨是

太子太保吏部尚書兼翰林院學士臣郭朴等謹
題爲比例陳情懇乞

天恩俯賜贈謚祭葬以光泉壤事該本部題驗封清吏司
案呈奉本部送准禮部咨該本部題祠祭清吏司案
呈奉本部送禮科抄出南京前軍都督府經歷司都
事陳一龍奏爲比例陳乞祭葬贈謚等因奉

聖旨禮部知道欽此該本部覆題奉

聖旨是准照例與祭葬欽此所擬贈官合咨查照施行等
因咨部已經查議具題奉

聖旨陳儒准贈戶部尚書欽此欽遵案呈到部查得贈官

例應給與

誥命欲照例行移翰林院撰文中書舍人關軸書寫理合
題

請但

恩典出自

朝廷臣等未敢擅便伏乞

聖裁緣係比例陳情懇乞

天恩俯賜贈謚祭葬以光泉壤事理謹題請

旨

嘉靖四十五年四月十一日

太子太保吏部尚書兼翰林院學士臣郭朴

左侍 郎臣毛愷

右侍 郎臣吳嶽

驗封清吏司署郎中事主事臣武金

本月十三日奉

聖旨是

誥命

奉

天承運

皇帝制曰人臣委質事君忠必期於盡瘁國家稽古定制
義每先於報功雖當致政之餘亦有賁終之寵彛章
具在激勸攸關爾故致仕都察院右都御史陳儒性
資嚴毅操履端方發跡賢科起官郎署督學浙省已
聞藻鑑之公佐政關中益著旬宣之績擢長藩臬荐
歷寺卿既臺省之踐更乃勲庸之茂績方隆委任轍
遂退閒顧爾行業之優實繫台衡之望期將復用忽

報長終追念往勞特加恩卹茲贈爾為戶部尚書錫
之誥命嗚呼人惟求舊式興故老之嗟沒有餘榮載
舉追崇之典眷爾英靈之未泯服予寵命于無窮欽
哉

制 誥

嘉靖四十五年四月十三日

之 寶

諭祭文

第一壇

維

嘉靖四十五年歲次丙寅八月己未朔越十八日丙
子

皇帝遣直隸常州府知府李幼滋

諭祭致仕都察院右都御史贈戶部尚書陳儒并配贈淑
人侯氏封淑人楊氏曰卿性資明敏學識優長早掇
甲科列官郎署出知劇郡歷晉臬藩因事謫遷旋復
登陟游更留部載總都臺勤勞有加勲庸茂著方隆
倚任遽爾訃聞特渙卹恩用酬往勩仍念爾配一德
相成內助既徵宜偕顯命遣官諭祭治塋飾工爾靈
有知尚同歆服

第二壇

維

嘉靖四十五年歲次丙寅八月己未朔越十九日丁丑

皇帝遣直隸常州府知府李幼滋

諭祭致仕都察院右都御史贈戶部尚書陳儒曰卿閎才

夙負直諫著聞中外宣猷勲勞並茂宜延壽考以遠

長終日月不居倏臨窀穸爰頒異渥諭祭載加

如存祇歆寵命